

**Højskolit pillugit Inatsisartut inatsisissaattut siunnersuut**

*Kultureqarnermut, Ilinniartitaanermut, Ilisimatusarnermut Ilageeqarnermullu Naalakkersuisumit saqqummiunneqartoq*

**pillugu**

**Kultureqarnermut, Ilinniartitaanermut, Ilisimatusarnermut Ilageeqarnermullu Ataatsimiititaliap**

**ISUMALIUTISSIISSUTAA**

Peqqussutip aappassaaneerneqarnissaanut saqqummiunneqartoq

Ataatsimiititaliap suliarinninnermini ukuninnga inuttaqarpoq:

Harald Bianco, Inuit Ataqatigiit, siulittaasoq  
Andreas Uldum, Demokraatit, siulittaasup tullia  
Juliane Henningsen, Inuit Ataqatigiit  
Debora Kleist, Inuit Ataqatigiit, (sinniisussaq)  
Ruth Heilmann, Siumut  
Doris Jakobsen, Siumut

UKA2010-imi siullermeerinerup kingunerisaanik ulloq 23. september Ataatsimiititaliap siunnersuut misissorpaa.

**Siunnersuutip imarisaa siunertaalu**

Højskolit pisinnaatitsilerfiusunik ilinniartitsinernik atuarfiup qaffasissusaata saniatigut neqerooruteqarsinnaanerat siunnersuutip akuersissutigineqarneratigut inatsisitigut toqqammavissai qulakkeerneqassapput. Højskolit ilinniartitsisinnaatitaanerat atuarfinni qaffasissuseq qaanger-nagu maannakkut inatsit atuuttoq naapertorlugu taamaallaat pisinnaavoq.

Ilinniagaqassutsip nalinginnaasumik qaffassarniarnerani suliniutit ilaattut aamma Kalaallit Nunaanni folkehøjskolit ilinniartitsinikkut suliniuteqarnermut peqataalersinnerisigut ilinnia-gaqarnissamut piukkunnarsarnissamullu periarfissatut neqeroorutit tamatigoornerusut anner-tunerusullu pilersikkumallugit inatsisissatut siunnersuut isigineqassaaq.

Siulersuisunut ilaasortat ataatsimoorlutik højskolinik ingerlatsineq, ilinniartitsinernik ineri-saaneq, pitsaassutsimik qularnaarineq, aqutsineq, aqqissugaaneq aningaasaqarnerlu pillugit

ilisimasaqartuussapput, aningaasanut missingersuutit naatsorsuutillu nalilernissaat ilanngullugit aammattaaq inatsisissatut siunnersuummi ersarissarneqarput.

### **Inatsisissatut siunnersuummik Inatsisartuni siullermeerineq**

Inatsisissatut siunnersuut ataatsimut isigalugu tapersorsorneqarpoq. Inatsisissamili siunnersuummi pissutsit pingasut oqallisigineqarput. Tassani pineqarput siunnersuutip aningaasatigut kinguneqaatissai, inatsisissatut siunnersuutip atuutilerfissaa kiisalu inatsisitigut siunnersuutip højskolit nalinginnaasumik peroriartuutaasumik ilinniartitsinerannut pingaarutaa.

### **Tusarniaanermi akissuteqaatit**

Inatsisissatut siunnersuut ulluni 28. majimiit ulloq 2. juli 2010-imut tusarniaassutigineqarsimasoq Ataatsimiititaliamit paasineqarpoq. Periusaasartut nalinginnaasut malillugit killissarittaasoq atorineqarpoq.

Tamatuma saniatigut Inatsisissatut siunnersuummut oqaaseqaatini qupp. 11-imi immikkoortut tallimaanni titarnerit aappassaanni naqinnernik kukkusoqarsimanera tusarniaanermi akissuteqaatini takkussimasuni takuneqarsinnaavoq, issuaaneq:

*” Aammattaaq IMAK siunnersuuteqarpoq, eqqarsaatigeqqullugu 11. klassimik nammineq Opiumassuseq naapertorlugu peqataaffigineqartartussamik folkehøjskolini pilersitsisoqarsinnaanera, nukissat eqaannerusumik katersornissaat taamaalillunilu aningaasanik atuilluarnerunissaq siunertaralugu”.*

Oqaaseqatigiit eqqortut ukuupput:

*” Aammattaaq IMAK siunnersuuteqarpoq, eqqarsaatigeqqullugu 11. klassimik nammineq Opiumassuseq naapertorlugu peqataaffigineqartartussamik folkeskolini pilersitsisoqarsinnaanera, nukissat eqaannerusumik katersornissaat taamaalillunilu aningaasanik atuilluarnerunissaq siunertaralugu”.*

Inatsisissatut siunnersuummut nalinginnaasumik oqaaseqaatinut paasinninnissaq taamatut tikkuaanermi Ataatsimiititaliamit ilassutitut (naqqiissutitullu) ilanngussaartoqarpoq, inatsisissatullu siunnersuummik aappassaaneerinninnissaq sioqqullugu Inatsisartut eqqornerusumik imaqarnerusumillu taamaalillutik aalajangernissamut tunngavissaqarnissaat qulakkeerlugu.

### **Ataatsimiititaliap inatsisissatut siunnersuummik suliarinninnera**

Inersuarmi inatsisissatut siunnersuummik siullermeerinninnermi ataatsimut isigalugu tapersorsorneqartoq aammalu pisinnaatitsilerfiusunik ilinniartitsinerup amerlanerusunut periarfisiinissamik siunertaqarneq isumaqatigiilluni tapersorsorneqartoq Ataatsimiititaliap maluginiarpa.

Inatsisissatut siunnersuummut atatillugu aningaasaliissutinik illikartitsisoqarsimannginnera isornartorsiorneqarsimammat siunnersuutip aningaasaqarnikkut kinguneqaatissai eqqarsaatigalugit Ataatsimiititaliap maluginiarpa. Tamanna Højskolit nutaanik suliakkersorneqarnissaannik inatsisissatut siunnersuut siunertaqannginnera nassuiaataasinnavoq. Akerlianik inatsisissatut siunnersuutip siunertaraa ilinniartitaanikkut højskolit siornatigornit annertunerusumik suleqataanerulernissaat qulakkiissallugu. Aammattaaq Ataatsimiititaliamit paasineqarpoq inatsisissatut siunnersuummik akuersissutiginninnerup kingunerissagaa, ilinniartitaanerup iluani suliniuteqarnermut atatillugu højskolit aningaasaliiffigineqarsinnaassasut, ilaatigut 40.91.03 Pikkorissartitsineq, imaluunniit konto pingaarneq 40.01.08 Ilinniartitaaneremut piler-saarut kiisalu ilinniartitaanerup immikkut ittumik suliniuteqarfigineqarnera, aqutigalugit.

Aammattaaq Inatsisissatut siunnersuummut atatillugu aningaasaliissutinik illikartitsisoqarsimannginnera pillugu isornartorsiorneqarsimanerata ilaa inatsisissatut siunnersuutip imarisaa-nut siunertarisaanulluunniit tunngatinneqanngimmat, taamaallaalli 2011-imut aningaasanut inatsisissatut siunnersuummit aallaaveqartoq tassani højskolit sipaarniarfigineqarnissaat ilanngunneqarsimammat Ataatsimiititaliap maluginiarpa.

Højskolinut sipaarutissatut eqqarsaatigineqartoq højskolit sulinerannut pitsaanngitsumik kinguneqaratarsinnaanerannut Ataatsimiititaliaq isumaqataavoq. Naalakkersuisut sipaarutissanik tullerriaarinerat Ataatsimiititaliamit isumaqatigineqanngilaq allatigullu sipaarutissanik Naalakkersuisut ujaasequllugit kaammattorlugit.

Immikkoortoq alla oqallisigineqarsimasooq tassaavoq inatsisitigut siunnersuutip atuutilerfissaa tassaasooq 1. januar 2011. Isornartorsiuineq taanna pivooq højskolininngaanniit tassa kissaatigineqarmat atuutilerfissaa ukiumik ataatsimik kinguartinneqassasooq piareersarluarnissamut piffissaqarnissaq innersuussutigalugu. Sulisartut kattuffiata SIK-ip aammattaaq tusarniaanermi akissuteqaatimini innersuussutigaa Sulisartut Højskoliata tusaarniaanermi akissuteqaataa SIK-imit isumaqatigineqartoq. Højskolit kinguartitsinissamik kissaataat Ataatsimiititaliamit paasineqarpoq. Inatsisissatut siunnersuut højskolinut nutaanik suliakkiinngittoq kisiannili højskolit inatsisitigut toqqammavigisaannut eqaallisaasussammata taamaalilluni nalinginnaasumik ilinniartitaanermi højskolit annertunerusumik akuutinneqarsinnaassammata Ataatsimiititaliamit maluginiarneqarpoq.

Aammattaaq soorlu ataatsimiittarfimmi akissuteqaatillu ilaanni eqqaaneqartutut inatsisissatut siunnersuutip kingunerisinnaava højskolit ilisarnaataat tassa højskolit nalinginnaasumik peroriartuutaasumik ilinniartitsisarnerata tammakarsinnaanera. Højskolit nalinginnaasumik peroriartuutaasumik ilinniartitseriaasiata attatiinnarneqarnissaa højskolit ingerlanerannut nukittorsaataasarneranut pingaaruteqarmat Ataatsimiititaliaq isumaqataavoq. Tamatumunngali peqatigitillugu pisinnaatitsilerfiusunik ilinniagaqartunik naammassinnissinnaasut amerlinerannik Inatsisissatut siunnersuut ilinniartitaanermi qaffasissutsimut ataatsimut isigalugu pitsanngor-saaqataasussammata Ataatsimiititaliap nassuerutigissavaa. Tassalu højskolip ilusaa immikkut

ittumik ilinniartitseriaatsimik avatangiisinik neqerooruteqarmat inuusuttunik amerlanerusunik pisinnaatitsilerfiusunik ilinniakkamik aallartitsisimanngitsunut nalinginnaasumillu ilinniagaqartut avatangiisaannit aallaaveqartumik aallartitsinissamut ilimanaateqanngitsunut pilerilersitsisussaavoq.

Ataatsimoorussamik ilinniartitaanermi suliaqarnermut højskolit ilaatinneqarsinnaanerat periarfissinneqartoq inatsisissatut siunnersuutip kingunerisussaammagu inatsisissatut siunnersuutip kingunerisassai Naalakkersuisut ataavartumik nakkutigissagaat Ataatsimiititaliap kaammattuutigissavaa.

### **Ataatsimiititaliap inassuteqaatai**

Qulaani oqaaseqaatigineqartut siullermeerinermilu oqaaserineqartut tunngavigalugit **ataatsimiititaliami amerlanerussuteqartut Inuit Ataqtigiinneersut Demokraatineersullu** siunnersuut **akuersissutigineqassasoq** inassutigaaat.


**Ataatsimiititaliami ikinnerussuteqartut Siumumeersut siunnersuut itigartinneqassasoq inassutigaaat siunnersuullu ima oqaaseqarfigissallugu:**


Siunnersuutip tusarniaassutiginerani Knud Rasmussenip Højskolia aammalu Sulisartut Højskoliani siulersuisut forstanderiisalu piumasaraat siunnersuut 1. januar 2011 atuuttuulernani aatsaat 1. januar 2012-mi atuutilissasoq. Taamatut piumasaqarneq SIK-mit isumaqataaffigineqartoq Siumup Atassutillu paasilluarpaat.

Højskolit inatsisissaata peqqissaartumik suliarineqarnissaa siunertaralugu maannakkut højskolit piusut piareersarfissaqarumallutik kissaateqarnerat SIK-llu tapersiinera paasilluarlugit Siumup Atassutillu inatsisip aatsaat 1. januar 2012-mi atuutilernissaa innersuussutigaaat.


Tusarniaanermi akissuteqaatit tunngavigalugit, paaseqatigiilluarnissarlu anguniarlugu Siumup Atassutillu innersuussutigaaat uuma siunnersuutip aappassaaneernissaa pingajussaaneernissaa Inatsisartut upernaakkut ataatsimiinnissaannut aatsaat pissasoq.


Taama oqaaseqarluni isumaliutissiisummilu allassimasutut paasinnilluni siunnersuut ataatsimiititaliap aappassaaniigassanngortippaa.

  
\_\_\_\_\_  
Harald Bianco

  
\_\_\_\_\_  
Andreas Uldum

  
\_\_\_\_\_  
Debora Kleist

  
\_\_\_\_\_  
Ruth Heilmann

  
\_\_\_\_\_  
Doris Jakobsen